

ԿԱՊԵՐՈՎ ՉԵՎԱԿՈՐԿԱԾ ԲԱՌԱԿԱՊԱԿՑՈՒԹՅՈՒՆՆԵՐԻ ԿԵՏԱԴՐՈՒԹՅՈՒՆԸ

Խոսքի դրսևորման երկու ձևերը՝ գրավոր և բանավոր, տարբերվում են նրանով, որ բանավոր խոսքը գրավորի նկատմամբ առավելություններ ունի. հնչերանգի, դիմային շարժումների, նպատակային դադարների և այլնայլ արտաքին երևույթների միջոցով խոսողը ճշտորեն արտահայտում է իր ցանկացածը և փորձում խոսքը դարձնել դիպուկ, նպատակասլաց և ի վերջո հասնել ցանկալի ազդեցության: Գրավոր խոսքը չունի վերը նշված արտահայտչամիջոցները: Այն արտահայտիչ, պատկերավոր ու հասկանալի դարձնելու, ունկնդիրների վրա ցանկալի ներգործություն ունենալու, նաև կանոնակարգելու համար խոսքի նվազագույն միավորը՝ նախադասությունը, կետադրում ենք: Բանավոր խոսքում նկատվող դադարները գրավոր խոսքում արտահայտվում են տրոհության նշաններով:

Ուշադրություն դարձնենք *կապ* խոսքի մասով ձևավորված կառույցներին և նրանց կետադրությանը: Եթե խոսքի նվազագույն միավորը նախադասությունն է, ապա նախադասության նվազագույն միավորը բառակապակցությունն է, այսինքն՝ խոսել կապային կառույցների մասին նշանակում է ուսումնասիրել կապային բառակապակցությունները: Բառակապակցությունը ո՛չ բառ է, ո՛չ էլ նախադասություն. բառից տարբերվում է նրանով, որ իր կազմում ունի մեկից ավելի բառեր, նախադասություն չէ, բանի որ չունի ստորոգում:

Շատ լեզվաբաններ բառակապակցությունը համարում են երկու և ավելի նյութական իմաստ ունեցող բառերի քերականական կապակցություն. այս դեպքում կապերով, ծայնարկություններով կազմված բառակապակցությունները բառակապակցություն չեն համարվում: Սակայն բառակապակցությունների բնույթը որոշվում է գերադաս անդամի խոսքիմաստային պատկանելությամբ, և եթե բառակապակցության գերադաս անդամը կապ է, այդպիսի բառակապակցությունը կհամարվի կապային բառակապակցություն: Օրինակ՝ ծառի վրա, ծառի տակ, ծառի մոտ, մարդու համար, ընդդեմ մարդու, արևի պես, մինչև լույս, դեպի դպրոց և այլն:

Բառակապակցությունները նախադասության մեջ կատարում են շարահյուսական մեկ պաշտոն: Կապային բառակապակցությունները նախադասության մեջ գործածվում են տարբեր շարահյուսական պաշտոններով և ըստ այդմ էլ տրոհվում են կամ չեն տրոհվում: Ինչպես գիտենք, կապերը սպասարկու բառեր են, արտահայտում են ստորադասական հարաբերու-

թյուններ. այս խոսքի մասը ինքնին նախադասության անդամ չի դառնում, այլ միանում է որևէ բառի հետ՝ և նրա հետ միասին դառնում նախադասության մեկ անդամ: Կապերը միշտ գործածվում են գոյականների կամ իբրև գոյական առնված այլ խոսքի մասերի հետ՝ ցույց տալով նրանց խնդրային կամ պարագայական պաշտոնը նախադասության մեջ:

Իրենց խնդրի հետ միասին կապերը դառնում են նախադասության մեկ անդամ և լրացնում են ստորոգյալին: Հետևաբար, կապով արտահայտված լրացումները հիմնականում խնդիրներն ու պարագաներն են: Սակայն գոյականական անդամի լրացումները նույնպես կարող են ձևավորվել կապերով և որոշակի դիրքերում կետադրվել: Բերենք կապով ձևավորված հետադաս որոշիչի դեպքեր.

Օրինակ՝ Շիկնած դեմքով ուղեկցուհիս ծովի պես աշխույժ, ազահու-
թյամբ նայում էր ծովին (Հայոց լեզվի հարցաշարերի շտեմարան «Ձան-
գակ» 1992թ., 2003թ., բնագիր 207¹): Երևի այն երկրում էլ պարզկա գիշեր է
աչքերի նման վառվող փայլփլուն աստղերով (Շտեմարան, բնագիր 44):

Երկվորյակ եղբայրները ածուխի պես սևորակ մազերով ու ընչացքով,
հարթածությունից գլուխները կորցրած, սկսեցին պարել (Շտեմարան, բնագիր
31): Սիա փոքրիկ լիճը՝ ալիքների բեկբեկուն արփափայլով, աչքի պես վճիտ
(Շտեմարան, բնագիր 25): Հիշում եմ Աղթամարի հնօրյա վանքը՝ կղզու վրա
թառած (Շտեմարան, բնագիր 22):

Ընդմիջարկված հատկացուցիչը նույնպես կարող է ձևավորվել
կապային բառակապակցությամբ:

Օրինակ՝ Միայն անհողմ ծփանքը դանդաղ սահում է ծովի հալված
պողպատի պես փայլող մակերեսով (Շտեմարան, բնագիր 207):

Այդ խորհրդավոր լռության մեջ լավում էր միայն ծղրիդի՝ քաղցած
մանկան լացի պես ճռինչը (Շտեմարան, բնագիր 94):

Արևի սկավառակը կախվել էր Օլիմպոսի վրա և լուսավորում էր նրա՝
դարերի համար կառուցված վեհապանծ տաճարներն ու հուշարձանները:
(Շտեմարան, բնագիր 13): Եփեսոսի բնակիչները հպարտանում էին Արտեմիսի
դարերի համար կառուցված տաճարով (Շտեմարան, բնագիր 57):

Թեև հարուստ էր, բայց համեստ կյանքով էր ապրում իր փափկակյաց
կյանքի համար նախասահմանված սրահներում (Շտեմարան, բնագիր 60):

Կապերով կարող է ձևավորվել մասնական բացահայտիչը, որը բուն
բացահայտիչից տարբերվում է և՛ ձևով, և՛ շարադասությամբ, և՛ իմաստով, այն
ձևավորվում է *որպես, իբրև, ինչպես, հանձինս, ի դեմս* կապերով, այս դեպքում
բացահայտիչը և բացահայտյալը իրարից տրոհվում են բուրով, իսկ
նախադասության մյուս անդամներից ստորակետով, եթե բացահայտիչին չի
հաջորդում օժանդակ բայ, որևէ կապ կամ էլ բառը: Մասնական բացահայտիչը

բացահայտյալի հետ կարող է համաձայնել կամ կարող է չհամաձայնել դեմքով, հոլովով, իսկ շարադասությունը կայուն չէ:

Օրնակ՝ Որպես Թորգոմա սերնդի շառավիղ ես եղել եմ բուռն, կրքոտ, դյուրագրգիռ (Շտ., բնագիր 183): Այն որպես կապտավուն հայելի, դրված է լեռնային գոգավորության մեջ (Շտ., բնագիր 179): Սիա տարագույն ծաղիկների ու թփերի մեջ երևում է նա իբրև ծիածանագույն մի փասխան (Շտ., բնագիր 201): Իբրև կրթված իշխան նա զուսպ էր և խոհեմ (Շտ., բնագիր 200): Դեռ ավտոբուս չնստած հիշեցի, որ Գեղարդի ծանապարհին Ողջաբերդի մոտ է Չարենցի կամարը (Շտ., բնագիր 16):

Կապերով ձևավորվում են նաև մասնավորեցնող տեղի և ժամանակի պարագաները, որոնք նույնպես տրոհում են պահանջում, այս պարագաները նաև անվանում են տեղի և ժամանակի մասնավորող բացահայտիչ:

Օրինակ՝ Խորեն աղայի տունը հենց աղբյուրի գիխին էր մրգատու ծառերով այգու մեջ (Շտ., բնագիր 195): Ներքևում փրփրաղեզ լճի ափերի մոտ, երևում էին Զիբուխլու գյուղի խրճիթները (Շտ., բնագիր 180): Գիրթ խթանելով երիվարներին՝ շարժվեցին առաջ դեպի գյուղ (Շտ., բնագիր 110): Մխիթարը կարգադրեց ճեպընթաց սուրհանդակ ուղարկել Տաթև Բայանդուր իշխանի մոտ (Շտ., բնագիր 39): Վաղը երեկոյան կողմ, հայկական եկեղեցում պատարագ կա (Շտ., բնագիր 106): Ամեն անգամ գրասեղանի մոտ նստելիս, Բեթիովենը քննախույզ մի ակնարկ էր գցում նկարի վրա (Շտ., բնագիր 100): Վրանի մոտ փոքրիկ խարույկի շուրջ, նստած էին զինվորները (Շտ., բնագիր 80): Քիչ այն կողմ գետի վրա, շղարշի պես կախվել էր մի նոսր մշուշ՝ որպես թեթև ու թափանցիկ ծուխ (Շտ., բնագիր 69): Գարնանը՝ հեղեղների ժամանակ, գետակը վարարում է և իր մեջ առնելով մեծ ու փոքր քարեր՝ առաջ է մղում իր աղմկահույզ ալիքները, շառաչում կիրճով մեկ (Շտ., բնագիր 11):

Բացահայտման կապերը երբեմն կարող են դրսևորել շաղկապին հատուկ շարահյուսական կիրառություն և կետադրվել: Այստեղ արդեն դրսևորվում է *կապ* խոսքի մասի առանձնահատկություններից մեկը՝ շաղկապին հատուկ շարահյուսական պաշտոնով հանդես գալը:

«Բառերի տեսակների բաժանումը ըստ խոսքի մասերի, հիմնված է նրանց գործածության եղանակի վրա, ուրեմն հենց որ գործածության եղանակը փոխվեց, փոխվում է նաև բառի տեսակը: Ամեն մի բառ, որ ի բնե համարվում է այսինչ տեսակի, կարող է հեշտությամբ անցնել մի ուրիշի, սրա համար բավական է, որ նա ընդունի թեքական այն ձևը, որ այդ մյուսը ունենում է»,-գրում է Դ.Աճառյանը իր «Լիակատար քերականություն հայոց լեզվի» 3-րդ հատորում²:

Այսինքն՝ խոսքի մասերի թափանցումը միմյանց մեջ և նրանց հատուկ շարահյուսական պաշտոնով գործածվելը հանգեցնում է, որ նշված կապերով ձևավորվում են պարագաներ, սակայն ինչպես արդեն համոզ-

վեցի՞նք. նրանք ձևավորում են նաև գոյականական անդամի լրացումներ, իսկ երբեմն էլ արտահայտում են առանձին հոլովածների իմաստ: Խոսքի մասերի թափանցումը միմյանց մեջ մեզ երբեք էլ առիթ չպետք է տա պնդելու, որ շարահյուսական նոր որակ դրսևորած խոսքի մասը վերածվել է այլ խոսքի մասի, այլ միայն այն, որ տվյալ բառը կարող է դրսևորել նաև լրացուցիչ շարահյուսական հատկանիշ՝ իրեն ոչ հատուկ: Որովհետև, հակառակ պարագայում, խոսքի մասերի դասակարգման մեջ շփոթ կառաջանա: Այն բառը պետք է համարվի *կապ*, որը նախադասության մեջ դրսևորում է միայն *կապ* խոսքի մասին հատուկ շարահյուսական դեր, ցանկացած դեպքում գործածվում է իբրև այդպիսին և չունի նյութական իմաստ: Մնացած բոլոր դեպքերում պետք է համարել, որ գործ ունենք այդ պահին կապային հատկանիշ դրսևորած այլ խոսքի մասի հետ, որը միայն ժամանակավորապես է իրեն այդպես դրսևորել և ցանկացած այլ դեպքում կարող է հանդես գալ կապին ոչ հատուկ շարահյուսական պաշտոնով: Բերենք կապերի շաղկապական կիրառության դեպքեր.

Օրինակ՝ Աներն ավելի ուժեղ է, քան երազանքը:

Նախքան մերոնք կանցնեին գետը, թշնամին անցավ հարձակման:

Փոխանակ ուշադիր լսես, խանգարում ես ուրիշներին:

Մինչ սպասում էինք հյուրերին, մանր անձրև սկսվեց:

Թեքվել էր, ինչպես ուռին է թեքվում ջրերի վրա:

Նա եղբորն ավելի է սիրում, քան քրոջը:

Չնայած գարունը բացվել էր, բայց դեռ ցուրտ էր:

Երբ բացահայտման կապերով ձևավորվում է ձևի պարագա և այն անմիջապես նախորդում է բայ-ստորոգյալին, չի տրոհվում: Ընդհանրապես ձևի պարագան՝ կապով ձևավորված, չի տրոհվում, եթե իր կազմում չունի դերբայ: Օրինակ՝ Նա երգում էր ինչպես սոխակ:

Տղան խոսում էր իբրև գործից տեղյակ մարդ:

Սակայն երբ մասնական բացահայտիչը լրացնում է բայական անդամին և բայի ու մասնական բացահայտիչի միջև կա գոյականով դրված անդամ, գործում է տրոհության մույն կանոնը, ինչ մասնական բացահայտիչի դեպքում: Օրինակ՝ Ամեն հայ մտնում է Մատենադարան որպես սրբատեղի, և խոսում ակնածանքով ու շշուկով (Շտեմարան, բնագիր 82):

Մասնական բացահայտիչը, լինելով գոյականական անդամի լրացում, երբեմն կապի շնորհիվ ունենում է պարագայական երանգ և կապվում բայի հետ: Բացահայտման կապերով երբեմն կարող են ձևավորվել նաև տրոհվող և չտրոհվող ձևի և հիմունքի պարագաներ:

Օրինակ՝ Նա որպես հմուտ հոգեբան, գիտեր ինչպես ոգևորեր բանակին (Շտեմարան, բնագիր 73):

Հաճախ շարադասությունն է որոշում լրացման բնույթը և ըստ դրա էլ՝ կետադրությունը: Օրինակ՝ Նա գիտեր որպես հմուտ հոգեբան՝ ինչպես ոգևորեր բանակի՝ մարտերում կոփված ոգին:

Եվ հենում է որպես աղոթք արքայական քո լեզուն: (4. Տերյան)

Մասնական բացահայտիչի և ձևի պարագայի միջև կա իմաստային և քերականական տարբերություն. ձևի պարագան բայական անդամի լրացում է, բացահայտիչը գոյականական, դրանով էլ պայմանավորված է նրանց կետադրությունը: Շփոթությունից խուսափելու համար կարելի է դիմել փոխակերպման. մասնական բացահայտիչը բուն բացահայտիչի վերածել այս ձևով ճշտելով արդյոք դառնում է գոյականի լրացում, թե ոչ: Օրինակ՝ Նա հմուտ հազեբանը, գիտեր... Նա գիտեր հմուտ հազեբանի նման, պես...

Միշտ չէ, որ այս միջոցը արդյունավետ է և կիրառելի, քանի որ այս կապերով դրվում է նաև ստորոգելական վերադիրը, չնայած այն կարող է նաև առանց կապի հանդես գալ:

Կապերով ձևավորվում են խնդիրներ: Խնդիրները սովորաբար չեն տրոհվում, սակայն չեն բացառվում շարադասության պատճառով նաև խնդիրների տրոհման դեպքեր:

Ինչպես ասվեց, տեղը և ժամանակը մասնավորող պարագաները, որոնք ձևավորվում են համապատասխան կապերով, տրոհվում են պահանջում:

Տեղը մատնանշող կապերն են *մեջ, վրա, մոտ, տակ, ի վար, ի վեր, ներքև, ներքո, միջև, հանդեպ, դիմաց, դեպի* և այլն:

Ժամանակը մատնանշող կապերն են *մինչև, ցմահ, օրօք, օրով, հետո, անց, նախքան, միջոցին, պահին, առաջ, առ, ժամանակ* և այլն:

Այս կապերով ձևավորված պարագաները հիմնականում չեն տրոհվում, չնայած կան դեպքեր, երբ հետադաս դիրքում ժամանակի պարագան տրոհվում է: Օրինակ՝ Այդպես վայելք էր ապրում նակարիչը հերթական գլուխգործոցի բարձր գնահատականը ստանալուց հետո:

Կապերով կարող են ձևավորվել նաև դերբայական դարձվածները, որոնք երբեմն տրոհվում են, երբեմն ոչ: Չեն կետադրվում *առաջ, հետո, մոտ, դեպքում, ժամանակ, մասին, պատճառով, պես, համար* կապերով ձևավորված դերբայական դարձվածները:

Օրինակ՝ Ափին հասնելուն պես զինվորները սկսեցին նետահարել արաբներին (Մուրացան «Գևորգ Մարգպետունի»):

Հիվանդ լինելու դեպքում էլ նա չէր բացակայում:

Անձրեղ գալու պատճառով հանդիպումը չկայացավ:

Ընթերելու ժամանակ սկսեց իր անցյալից պատմել:

Զանգը հնչելուց հետո երեխաները մտան դասարան:

Դերբայական դարձվածով արտահայտված ծավալուն վերջադաս պարագաները երբեմն տրոհվում են նաև լրացյալին կապով միանալու

դեպքում: Օրինակ՝ Ուժեղ ցնցում էր պետք ինձ այդ անտարբերությունից հանելու համար (Նար -Դոս «Ես և Նա»):

Համար կապով ձևավորված նախադաս նպատակի պարագաները չեն տրոհվում, իսկ վերջադասները տրոհվում են բութով: Օրինակ՝ Դստերը աստվածների բարեհաճությանն ու հովանավորության արժանացնելու համար երվանդ արքան նրան երկու տարի պահել էր Բագրևանդում:

Երվանդ արքան դստերը երկու տարի պահել էր Բագրևանդում՝ նրան աստվածների բարեհաճությանն ու հովանավորության արժանացնելու համար (Հ. Խաչատրյան «Երվանդ Սակավակյաց» էջ 27):

Եհիշ կետադրելու համար պետք է համոզվել, որ նշված բառակապակցությունը նպատակի պարագա է, որովհետև երբեմն *համար* – ով ձևավորված այլ պարագաներ կարող են շփոթության տեղիք տալ: Դա կարելի է անել ստորոգյալից հետո *որպեսզի, որ* շաղկապները վերականգնելու և դերբայը դիմավոր բայ դարձնելու միջոցով: Օրինակ՝ Նա ջրի ակունքն էր գնում, (որպեսզի, որ) դաշտը ջրի (ինչի՞ համար, ի՞նչ նպատակով):

Օրինակ՝ Չափազանց թանկ վճարեց հայոց այրուծին քուշան խուժանին հյուրընկալվելու համար (Շտեմարան, բնագիր 3):

Նպատակի պարագա երկրորդականով բարդ ստորադասական նախադասությունները փոխակերպելիս ստացվող բառակապակցությունները կազմվում են *համար, նպատակով* կապական բառերով: Օրինակ՝ Նա գնաց աղբյուր ջուր խմելու (համար, նպատակով): Կապերով կարող է ձևավորվել տրոհվող ձևի պարագա, եթե բառակապակցության մեջ առկա է դերբայը: Օր.՝ Առանց մի խոսք ասելու նստեց: Նրա կապույտ խոշոր աչքերը փայլում էին գարնան արևի պես: Կապերով կարող է ձևավորվել տրոհվող պատճառի պարագա: Օրինակ՝ Ծիրանենին ժամանկից շուտ ծաղկաթափվեց՝ Արարատյան դաշտում անակնկալ ցրտեր սկսվելու պատճառով:

Ըստ, համաձայն, հիմամբ, հիման վրա, նայած, չնայած կապերով ձևավորվում է հիմունքի պարագան, որը տրոհվում է դերբայական դարձվածի նման նախադաս և հետադաս դիրքում բութով, միջադաս դիրքում՝ երկու կողմից ստորակետով: Օրինակ՝ Համաձայն տնօրենի որոշման՝ դասերը կսկսվեն ժամը իննին: Դասերը կսկսվեն ժամը իննին՝ համաձայն տնօրենի որոշման: Դասերը, համաձայն տնօրենի որոշման, կսկսվեն ժամը իննին:

Բացառման և զիջման հարաբերությունն արտահայտող կապերով և կապական բառերով ձևավորվում է բացառման կամ զիջման պարագան: Այս պարագաները ձևավորվում են *բացի, առանց, գատ, փոխանակ, հանդերձ, չնայած, չհաշված, հակառակ* կապերով և կապական բառերով: Այս պարագաները, կախված շարադասությունից, կետադրվում են դերբայական դարձվածի նման: Օրինակ՝ Առանց խոսելու՝ նստեց: Նստեց առանց խոսելու: Նա, առանց խոսելու, նստեց:

Կետադրության նկատմամբ որոշակի առանձնահատկություններ է դրսևորում *առանց* նախադրությունը:

Առանց նշանակում է *չունենալ*, *չունի*, երբեմն էլ կարող է ունենալ *թող, բացի, չհաշված* նշանակություններ (Հր.Աճառյան-Արմատական բառարան, էջ 212): Միշտ ստանում է սեռական հոլովով խնդիր: Այս նախադրությամբ ձևավորված բառակապակցությունները *չունենալ* իմաստով գործածվելու դեպքում չեն կետադրվում, եթե բառակապակցության մեջ դերբայ չկա, իսկ *բացի, չհաշված* իմաստով գործածվելու դեպքում կետադրվում են դերբայական դարձվածի նման: Օրինակ՝ Մնաց առանց հացի: Ձեռքը մեկնեց ինձ առանց մի խոսք ասելու: Ջիջման պարագան չի տրոհվում, եթե ընկած է օժանդակ բայի, հանգույցի, *էլ* վերաբերականի հարևանությամբ: Օր. Ի՝ հեճուկս քեզ էլ նա կանի այդ բանը:

Ջիջման պարագան շատ հաճախ կարելի է շփոթել նույն կապերով ձևավորված այլ պարագաների հետ, որը տրոհում է չի պահանջում:

Օրինակ՝ Ամեն ինչ եղավ քո ասածին հակառակ:

Հաճախ տրոհվում են նաև դերբայական դարձվածով չարտահայտված և լրացյալին կապով միացած հիմունքի, զիջման, պարագաները, բացառման անուղղակի խնդիրը: Օրինակ՝ Այս ամենը, ըստ իս, ճիշտ է:

Բացի նամակներից տղան հողվածներ էր գրում:

Այսպիսով, փորձեցինք որոշ չափով պարզեցում և համակարգում մտցնել կապային բառակապակցություններով ձևավորված շարահյուսական միավորների կետադրության մեջ: Սակայն պետք է ընդունել, որ կետադրությունը անձի անհատականության հետ կապ ունեցող երևույթ է, և այն վերջնականորեն համակարգելը այնքան էլ հեշտ չէ:

Օգտագործված գրականության և ծանոթագրությունների ցանկ

1. Օրինակների մասը մեջբերված է հայոց լեզվի 2003 թ. հարցաշարերի շտեմարանից:
2. *Հ.Աճառյան*, Լիակատար քերականություն հայոց լեզվի, Երևան 1957, հատոր 3: Լույսի, Արմատական բառարան, էջ 212, հ. 1:
3. *Է. Աղայան*, Ժամանակակից հայերենի հոլովումը և խոնարհումը, Երևան 1967, էջ 67:
4. *Ա. Ղարիբյան*, Հայոց լեզվի դասավանդման մեթոդիկա, Երևան 1954, էջ 364:
5. *Ա. Ս. Մարգարյան*, Ժամանակակից հայոց լեզու, Երևան 1990, էջ 302:
6. *Ա. Գ. Աբրահամյան*, Ժամանակակից հայերենի քերականություն, Երևան 1975, էջ 189, նույնի, Չթեքվող խոսքի մասերը և նրանց բառական ու քերականական հատկանիշների փոխհարաբերությունները ժամանակակից հայերենում, Երևան 1965, էջ 340:
7. *Մ. Ե. Սատրյան*, Ժամանակակից հայոց լեզու, Երևան 1989, էջ 362:
8. *Ա. Քոսյան*, Ժամանակակից հայերենի նախադասության վերլուծության հարցեր, Երևան 1976, էջ 62-186:
9. *Լ. Չաքարյան*, Կետադրական բառարան, Երևան 1998:
10. *Ա. Աբրահամյան*, Հայերենի կետադրությունը, Երևան 2002:
11. *Յու. Դավթյան*, Կետադրական ինքնուսույց, Երևան 2000:
12. *Ռ. Իշխանյան*, Արդի հայերենի շարահյուսություն, Պարզ նախադասություն, Ե. 1986, 38:
13. *Գ. Լ. Գարեգինյան*, Ժամանակակից հայոց լեզու, Երևան 1997, էջ 288: